

笄橋劉氏總譜序

氏之有譜所以述先德序昭穆垂
子孫之軌範備鄉黨之瞻觀且其
紀載率皆實錄足以廣郡邑之文
獻補國史之闕遺而藉此以敬宗
收族則固羣治之階梯也隋唐以
上有圖譜局以掌其事故人尚譜

系之學家藏譜系之書而自家而
國而天下若網在綱如身使臂事
甚盛也邑之笄橋為吾宗聚族而
居之地自西晉初葉安成公肇
基以來千六百載代有聞人列祖
列宗嘉言懿行至今猶為世人所
稱述舉其要領則皆立己立人之

道合乎天壤之正誼與人羣相生
相樂而無間也竊嘗聞之古今中
外聖哲莫不重羣講學則有敬業
樂羣之訓論詩則有興觀羣怨之
旨而西人斯賓塞爾則著為羣學
說明人類進化其機括實繫於羣
而吾國家族之制實為羣之嚆矢

者也故國父民族主義力闡尚
書克明峻德以親九族之義昭示
國人由家族而宗族擴而大之以
進於國族社會于以進化民族于
以繁昌國家即因之強盛其本源
胥在是也然則族之有譜紀其源
流用昭奕葉義滋重矣吾族筮橋

總譜倡於怡卿老人約貞先生實
董修纂中更兵燹圖籍瀕毀賴兩
辰鳳鳴諸先生分運移度苦心將
護事平後收輯讎勘丙戌夏乃得
付梓殫精竭慮備歷艱險卒底於
成蔚然為吾族文獻大觀有足紀
者建緒連年從事軍政於東南各

行省弗克躬分其勞每一念及深
滋疚媿茲幸聞其藏事因有感夫
宗族國族之義實本於羣爰為發
其旨趣而述其事之本末於此若
夫祖先之垂訓歷代之遺規載在
譜端昭昭萬古後之人嚴以守之
篤以行之以求盡其為己為族為

國而宏人羣之真理其光大熾昌
當未有艾也中華民國三十六年
孟春之吉清安裔孫建緒恢先甫
謹撰并書

